

ՀԱՍՄԻԿ ԱԲՐԱՀԱՄՅԱՆ

Պատմական գիտ. թեկնածու, ՀՀ ԳԱԱ ՀԱԻ

ԾՈՍԸ ՀԱՅՈՑ ՏՈՆԱԾԻՍԱԿԱՆ ՄՇԱԿՈՒՅԹՈՒՄ (ՆԱԽՆԱԿԱՆ ԴԻՏԱՐԿՈՒՄՆԵՐ)¹

ՆԵՐԱԾՈՒԹՅՈՒՆ

Մենդից, ջրից, կենցաղավարման որոշ հանգամանքներից ժամանակավորապես հրաժարվելը տարբեր ժողովուրդների ծիսական մշակույթի կարեւոր դրվագներից է եւ ձեւավորվել է կենսական անհրաժեշտությունից ու սնահավատական պատկերացումներից ելնելով²: Քրիստոնեություն շրջանում այդ երեւույթը վերարժեւորվեց՝ նախեւառաջ վերաբերելով մարդու հոգեւոր աշխարհին, սակայն չբացառելով նաեւ նյութական գոյությունները: Այն կոչվում է պահք եւ ունի սահմանափակումների տարբեր ձեւեր եւ աստիճաններ: Գրիգոր Տաթեւացին սննդային պահքի երեք տեսակ է ներկայացնում. պահք, որի ընթացքում մսից հրաժարվում էին եւ պտղով ու բույսերով էին սնվում, սրբապահք, որի ժամանակ զերծ էին մնում տնկիների պարարիչ նյութերից (ձեթ, գինի եւ այլն), եւ ծովապահք, որն ամեն տեսակի ուտելիքից եւ ջրից հրաժարումն էր³: Հայերենի բարբառներում պատճառ եւ ծոմը հաճախ գործածվում են որպես հոմանիշներ, թեւեւ իմաստային տարբերություններ ունեն⁴:

¹* Ստացվել է՝ 5.03.2025, գրախոսվել է՝ 12.03.2025:

Էլ. հասցե՝ hasmikabrahamyanihase@gmail.com:

² Հոգվածը գրվել է ՀՀ ԳԱԱ Հնագիտության եւ ազգագրության ինստիտուտում իրականացվող «Պատը հայոց սոցիալ-մշակութային համակարգում» գիտական թեմայի շրջանակում՝ բազային ֆինանսավորմամբ:

³ Տէն ԳՐԻԳՈՐ ՏԱԹԵՎԱՅԻ, Ձմեռան հատոր, Երուսաղէմ, 1998, էջ 148: Այս տարբերությունները մասամբ ծանոթ են ավելի վաղ՝ Դավիթ Ալավկա Որդու, Մխիթար Գոշի, Հովհաննես Երզնկացու գրվածքներից (տես Հ. ՎԱՐԳԱՆ Վ. ՀԱՅՈՒՆԻ, Ծաշեր եւ խնճոյք հին հայոց մէջ (այսուհետ՝ Ծաշեր եւ խնճոյք...), Վենետիկ, 1912, էջ 404–405): Պահքի տեսակների եւ ժամկետների մասին տես նաեւ Հ. ՎԱՐԳԱՆ Վ. ՀԱՅՈՒՆԻ, Ծաշեր եւ խնճոյք..., էջ 402–449, ԱՆԴՐԱՆԻԿ Ծ. ՎՐԴ. ԿՈՆՆԵԱՆ, Հայ ծիսական պաշտամունք, Պէյրով, 2001, էջ 74–84: Վանական միաբանություններում պահեցողության եւ ծոմապահության ընդունված կարգերի մասին տես Լ. ԹՈՒՄԱՆՅԱՆ, Վանականության կանոնները եւ ծիսակարգերը հայոց մէջ, Գիրք առաջին, Երեւան, 2023, էջ 151–172:

⁴ Տէն Հ. ՄԵՍՐՈՊՅԱՆ, Կրոնականեղեցական բառապաշարը հայերենի բարբառներում, Երեւան, 2016, էջ 186–187, 312: Քանի որ հոգվածն ազգագրական բնույթի է, շարադրանքում

Սույն հոդվածում քննարկվում են ծոմապահի ժողովրդական դրսեւորումները, մասնավորաբար՝ ժամկետները, տեսակները, տեւողութիւնը, ծոմը լուծելու եղանակները՝ համեմատելով եկեղեցական ավանդույթի հետ:

Ծոմապահութիւնը հայոց եկեղեցական եւ ժողովրդական տոնածիսական մշակույթում եւ կենցաղում ուրույն տեղ ունի: Ծոմապահութիւն ժամկետներ (մեկօրյա, եռօրյա, հնգօրյա, յոթնօրյա, քառասնօրյա) ու դրսեւորման ձեւեր հանդիպում են Սբ. Գրքում⁵, պատմիչների երկերում⁶,

պահին զուգահեռ, օգտագործվում է նաեւ պատմաբանները:

⁵ Հին Կտակարանում հետեւյալ դրվագներում ծոմը ջրից, սննդից (Յսթեր, Դ. 16, Զաքարիա, է. 5–6) եւ յուղից (Սաղմոս ՃԼ. (ՃԹ.) 24) հրաժարումն է: Ծոմն ուղեկցվում է ողբով ու լացով (Բ. Թագավորաց, Ա. 12, Նէեմի, Ա. 4, Հովել, Բ. 12–13, Զաքարիա, է. 4–6), գետնին քնելով (Բ. Թագավորաց, ԺԲ. 16), քուրձ հագնելով (Գ. Թագավորաց, ԻԱ. 27, Նէեմի, Թ. 1, Սաղմոս, ԼԴ. (ԼԵ) 13, Սաղմոս ԿԼ. (ԿԹ.) 11–12), աղոթելով (Հովել, Ա. 14), գլխին մոխիր լցնելով (Նէեմի, Թ. 1) եւ մարմնական այլ դրսեւորումներով: Ծոմ պահում են մեղքը քաղելիս (Ա. Թագավորաց, է. 6), մահացածին սգալիս (Բ. Թագավորաց, Ա. 12), հիվանդի համար առողջութիւն հայցելիս (Բ. Թագավորաց, ԺԲ. 16), Աստուծոյ օգնութիւնն ապավինելիս (Նէեմի, Ա. 4, Յսթեր, Դ. 16) եւ այլ դրվագներում:

Եթե Հին Կտակարանում ծոմապահութիւնն առանցքում մարմնական դրսեւորումներն են, ապա Նոր Կտակարանում կարեւորվում է ծոմապահութիւնն ոչ թէ տեսանելի կողմը, այլ հոգեւոր բովանդակութիւնը (Մատթեոս Զ. 16–18, Թ. 14–15, Մարկ. Բ. 18–20, Դուկաս Ե. 33–39, ԺԸ. 9–14): Նոր Կտակարանում ծոմապահութիւնն դրվագներ հանդիպում են նաեւ Գործք Առաքելոցում (ԺԴ. 2–3, ԺԴ. 22, ԻԷ. 9), Պողոս առաքյալի՝ Կորնթացիներին ուղղված Բ. թղթում (Բ. Կորնթ., Զ. 3–6):

Վերոբերյալ օրինակներում Աստվածաշնչի որոշ հրատարակութիւններում գրված է ծոմ (տես, օրինակ, Աստուածաշունչ գիրք Հին եւ Նոր Կտակարանաց Եբրայական եւ Յունական բնագիրներէն թարգմանուած, Կոստանդնուպոլիս, 1921: Աստուածաշունչ մատեան Հին եւ Նոր Կտակարանների, Արեւելահայերէն նոր թարգմանութիւն, Վերահրատարակութիւն, Մայր Աթոռ Սբ. Էջմիածնի եւ Հայաստանի Աստուածաշնչային ընկերութեան, 1999), որոշներում՝ պահք (տես, օրինակ, Աստուածաշունչ մատեան Հին եւ Նոր Կտակարանաց ըստ ճշգրիտ թարգմանութեան նախնեաց մերոց ի հելլենական հաւատարմագոյն բնագրէ ի հայկականս բարբառ, ի Վենետիկ, 1805): Գիրք Աստուածաշունչ Հին եւ Նոր Կտակարանաց, Հստ միաբան վաղեմի գրչագրաց մերոյ եւ յոյն բնագրաց, ի Վենետիկ, 1860: Աստուածաշունչ մատեան Հին եւ Նոր Կտակարանաց, Հայաստանի Աստուածաշնչային ընկերութիւն, 1997):

Նկատի առնելով այն, որ քրիստոնեութիւնն սկզբնական շրջանում ծոմը նշանակել է օրական մեկ անգամ սնվել պահքի կերակուրներով, իսկ պահքը՝ առհասարակ ոչինչ չուտել (այս մասին տես ՄԱՂԱՔԻԱ ԱՐՔ. ՕՐՄԱՆՅԱՆ, Ծիսական բառարան, Երեւան, 1992, էջ 24, 36: Նույնի՝ Հայոց եկեղեցին, Երեւան, 1993, էջ 205–206: Ա. ՂԱԶԱՐՅԱՆ, Պահք, «Քրիստոնյա Հայաստան հանրագիտարան» (այսուհետ՝ Հ2), Երեւան, 2002, էջ 843), հետեւաբար՝ Սուրբ Գրքի տարբեր հրատարակութիւններում ծոմ եւ պահք հասկացութիւնների գործածումը հասկանալու համար բնագրագիտական ուսումնասիրութիւն է անհրաժեշտ, ինչը սույն հոդվածի նպատակի դաշտում չէ:

⁶ Տես, օրինակ, ԶԱՔԱՐԻԱ ՔԱՆԱՔԵՌՅԻ, Պատմագրութիւն, Երեւան, 2013, էջ 69, ՍՏԵՓԱՆՈՍ ՏԱՐՈՆԵՑԻ ԱՍՈՂԻԿ, Պատմութիւն տիեզերական, Երեւան, 2000, էջ 228, 229–230: Նշված աղբյուրներում հիշատակվում են միաբանների ծոմապահութիւնն դրվագներ:

մեկնություններում⁷, գեղարվեստական գրականության մեջ⁸, ճանապարհորդական գրառումներում⁹, ԺԹ. դարի մամուլում¹⁰, հուշագրություններում¹¹, ազգագրական սկզբնաղբյուրներում եւ այլուր:

Կանոնագիտական գրվածքներում ծոմապահության վերաբերյալ հրահանգները հիմնականում վերաբերում են տոնական եւ ծիսական կարգերին¹²: Մեզ հայտնի ամենավաղ թվագրվող աղբյուրը, որտեղ ծոմը հիշատակվում է պահքից զատ, Հովհան Մանդակունու է. կանոնն է, ուր խոսվում է Պենտեկոստեից առաջ ծոմապահք պահելու կարգի մասին¹³:

⁷ Սբ. Գրքի մեկնություններում հաճախ են անդրադառնում Աստվածաշնչի ծոմապահության երեք մեծ դրվագներին՝ Մովսեսի (Ելից գիրք, ԼԳ. 28), Նդիա մարգարեի (Գ. Թագավորաց, ԺԹ. 6–8), Հիսուսի (Մատթ. Գ. 1–11, Մարկ. Ա. 12–13, Դուկ. Գ. 1–13) քառասնորյա ծոմապահություններին, որոնք կապում են երեք քառասնորյաց (հիսնակաց) պահքերի հետ (տե՛ս, օրինակ, Հովհան ՄԱՆԳԱԿՈՒՆԻ, Թուղթ պահքի պնդության մասին, «Գանձասար», Գ., Երեւան, 1993, էջ 138, «Մեկնություն սրբոյ Աւետարանին, որ ըստ Մատթէոսի, արարեալ ի սրբոյն ՆԵՐՍԻՍԷ ՇՆՈՐՀԱԼԻՈՅ մինչ ի համարն 17. հինգերորդ գլխոյն. եւ անտի աւարտեալ յերանելոյն ՅՕՀԱՆՆՈՒ ԵՐՁՆԿԱՑԻՈՅ՝ որ կոչի ԾՈՐԾՈՐԵՑԻ», Կ Պօլիս, 1825, էջ 363, ԳՐԻԳՈՐ ՏԱԹԵՒԱՅԻ, Գիրք հարցմանց, Երուսաղէմ, 1993, էջ 653:

⁸ Տե՛ս, օրինակ, ԲԱՅԱԾԻ, Սալբի, Երկերի ժողովածու, հտ. Ա., Երեւան, 1962, էջ 76–77, ԲԱՅԱԾԻ, Կայծեր, Մասն Ա., Երկերի ժողովածու, հտ. Դ., Երեւան, 1956, էջ 256, 266–267, Պ. ՊՈՒՇԵԱՆ, Շահեն, Երկերի ժողովածու, հտ. Բ., Երեւան, 1962, էջ 501–502, Պ. ՊՈՒՇԵԱՆ, Կովածաղիկ, Երկերի ժողովածու, հտ. Գ., Երեւան, 1963, էջ 345, ՄՈՒՐԱՅԱՆ, Առաքյալը, Համաշխարհային գրականություն պատանիների համար, Երեւան, 1989, էջ 532, Ղ. ԱՂԱՅԱՆ, Սերը արտաքսված, Երկերի ժողովածու, հտ. Ա., Երեւան, 1962, էջ 272, 288, ՆԱՐ-ԴՈՍ, «Բարերար եւ որդեգիր», Վիպակներ, Երկերի ժողովածու, հտ. Ա., Երեւան, 1989, էջ 359: Այս խումբ աղբյուրներում վկայվում են տոնածիսական եւ կենցաղային դրվագներին առնչվող ծոմապահության դեպքեր:

⁹ Տե՛ս, օրինակ, Օտար աղբյուրները Հայաստանի եւ հայերի մասին, 4, Թուրքական աղբյուրներ, Գ., է. ՉԵԼԵԲԻ, Երեւան, 1967, էջ 257:

¹⁰ Տե՛ս օրինակ, ՄԿՑ, Վանայ ծովի կղզիները, «Արձագանք», Թիֆլիս, 1882, թիւ 20, էջ 313:

¹¹ Տե՛ս, օրինակ, Տ. ՓԻՐՈՒՄԵԱՆՑ, Պատկերներ Վասպուրականի հայոց կեանքից (իմ յիշողութիւններից), Թիֆլիս, 1888, էջ 108–109:

¹² Տե՛ս, օրինակ, Սահակ Ա. Պարթեւ կաթողիկոսի (387–439 թթ.) անվամբ հայտնի «Թէ որպէս սահմանեցաւ կարգ ուխտի եւ որոշման վանաց» կանոնախմբի Խ. կանոն (տե՛ս Կանոնագիրք Հայոց, աշխատասիրությամբ՝ Վ. ՀԱՎՈՐԵԱՆԻ, հտ. Ա., Երեւան, 1964, էջ 397: Կանոնախմբի թվագրման մասին տե՛ս Ռ. ՎԱՐԳԱՆՅԱՆ, Հայոց Տոնացույցը (4–18-րդ դարեր), Երեւան, 1999, էջ 45–57): Կան նաեւ այլ դրվագներ, ինչպես, օրինակ, հեթանոսների մոտ գերեվարությունից վերադառնալուց հետո՝ ապաշխարության շրջանում, որը թելագրվում է Պարտավի Բ. ժողովի (768 թ.) ԻԳ. կանոնով (տե՛ս ԱՔԷԼ ԱՐՔ. ՄԽԹԱՐԵԱՆ, Պատմություն ժողովոց Հայաստանեայց Եկեղեցւոյ, Վաղարշապատ, 1874, էջ 98: «Կանոնագիրք Հայոց»-ում «Կանոնը Սիոնի Հայոց Կաթողիկոսի» անվամբ ընդգրկված այս ժողովի՝ արդեն ԻԲ. կանոնում հիշատակվում է ոչ թե ծոմ, այլ՝ պահք (տե՛ս Կանոնագիրք Հայոց, հտ. Բ., աշխատասիրությամբ Վ. ՀԱՎՈՐԵԱՆԻ, Երեւան, 1971, էջ 16–17):

¹³ Տե՛ս Կանոնագիրք հայոց, Ա., էջ 497–498:

Եկեղեցական ավանդույթի համաձայն՝ ծոմապահության հրահանգվում է Սբ. Հաղորդությանից առաջ¹⁴, բացառությամբ առողջապես տկարների, հղիների, երեխաների¹⁵: Ծոմապահ պիտի լինի նաև այն հոգեւորականը, որը պատրաստվում է մոտենալ Սբ. Խորհրդին, այսինքն՝ Պատարագ մատուցել եւ հաղորդություն բաշխել¹⁶:

Հայոց Եկեղեցու Տօնացոյցի տարբեր խմբագրություններում¹⁷, որոշ Տօնապատճառներում¹⁸ ամրագրված է պաճֆ ձեւակերպումը (տարվա շուրջ 160 օրը սննդային պահք է¹⁹), իսկ ծոմ, որպես առանձին միավոր, չի հանդիպում²⁰, ըստ ամենայնի, քանի որ այն պահքի դրսեւորումնե-

¹⁴ Հաղորդությանն առավոտյան անոթի՝ ծոմապահությամբ մոտենալու ավանդույթը սկսել է տիրապետել Դ. դարում (այս մասին տե՛ս Հայ մատենագիրները Սբ. Հաղորդության խորհրդի մասին (Ե.-ԺԸ. դարեր), աշխատասիրութեամբ Յ. ՔԵՍԵՆՅԱՆԻ, Սբ. էջմիածին, 2021, էջ 7–8):

¹⁵ Հայ Եկեղեցու հայեր, է., ՎԱՐԴԱՆ ԱՅԳԵԿՅԻ, Ա. Խրատ քահանաներին եւ ժողովրդին, Ս. էջմիածին, 2008, էջ 25, Հայաստանյայց Առաքելական Սբ. Եկեղեցու յոթ խորհուրդները, կազմող՝ Շ. ԴԱՎԹՅԱՆ, Երեւան, 1992, էջ 45, ԶԱՔԱՐԻԱ ՎՐԴ. ԲԱՂՈՒՄՅԱՆ, 100 հարց Ս. Հաղորդության մասին, Երեւան, 2014, էջ 64:

¹⁶ Բ. Առաքելական կանոնների ԾԹ. կանոնը հրահանգում է քահանային շաբաթ եւ կիրակի ծոմ պահել (տե՛ս «Երկրորդ Առաքելական կանոնիս (Կղեմէս)», Կանոնագիրք Հայոց, Ա., էջ 91: Կանոնների թվագրության մասին տե՛ս Ռ. ՎԱՐԴԱՆՅԱՆ, նշ. աշխ., էջ 59): Այս հրահանգը հավանաբար վերաբերում է այն ժամանակին, երբ բացի կիրակիից, շաբաթ օրերին եւս պատարագ է մատուցվել (տե՛ս Հայ Եկեղեցու Պատարագի օրերն ու տեսակները, Ի Հ. ՎԱՐԴԱՆՅԱՆ ՀԱՅՈՒՆԻՈՅ, Վենետիկ, 1898): Հովհան Օձնեցու Ա. կանոնով հոգեւորականին հրահանգվում է, որ եթե «յարբեցութեան գտեալ՝ մի՛ իշխեսցէ պաշտել զկարգն», մինչեւ ապաշխարության, պահքով եւ աղոթքով չսրբվեն, այլապես կարգալույծ կլինի (տե՛ս Կանոնագիրք Հայոց, Ա., էջ 516–517): Ազգային-եկեղեցական ժողովի կարգավիճակ չունեցող Սսի Բ. ժողովի (1243 թ.) Ե. կանոնով հոգեւորականին հրահանգվում է խորհրդակատարությունից առաջ ծոմ պահել՝ բացառությամբ մահվան վտանգի առջեւ կանգնածին հաղորդելը (ԱԲԷԼ ԱՐՔ. ՄԽԻԹԱՐԵԱՆՅ, նշ. աշխ., էջ 123, հմմտ. ՄԱՂԱՔԻԱ ԱՐՔ. ՕՐՄԱՆԵԱՆ, Ազգապատում, հտ. Բ., Ս. էջմիածին, 2001, էջ 1900–1901):

¹⁷ Տե՛ս, օրինակ, Ռ. ՎԱՐԴԱՆՅԱՆ, նշ. աշխ., էջ 41, 212–213, 228–29, 270–278, 420–490, 613–639: Զի հանդիպում նաեւ Տօնացոյցի՝ Սիմեոն Երեւանցու խմբագրած տարբերակում (տե՛ս Տօնացոյց, աշխատասիրութեամբ ՏԵԱՌՆ ՍԻՄԵՕՆԻ յօգնաջան եւ սրբազան Կաթողիկոսին Ամենայն Հայոց, էջմիածին, 1774–1775):

¹⁸ Վարդան Հաղբատեցու, Վարդան Արեւելցու, Հովհաննես Գանձակեցու խմբագրած տոնապատճառներում «Պատճառք Առաջաւորաց» խորագրով մեկնությունում այս պահքի շրջանում հայոց մեջ ծոմ պահելու մասին չի հիշատակվում, (տե՛ս ՏՕՆԱՊԱՏՃԱՌ ԺՈՂՈՎԱԾՈՒ. Վարդան Հաղբատեցու, Վարդան Արեւելցու, Հովհաննես Գանձակեցու խմբագրությունները (այսուհետ՝ ՏՕՆԱՊԱՏՃԱՌ ԺՈՂՈՎԱԾՈՒ), հրատարակության պատրաստեց՝ Ա. ՕՀԱՆՋԱՆՅԱՆԸ, Ս. էջմիածին, 2016, էջ 281–286):

¹⁹ ՄԱՂԱՔԻԱ ԱՐՔ. ՕՐՄԱՆՅԱՆ, Հայոց եկեղեցին, էջ 215:

²⁰ Ծոմը հիշատակվում է Հայ Առաքելական եկեղեցու տարբեր թեմերի օրացույցներում, որոնք Հայոց Եկեղեցու տոներին զուգահեռ ընդգրկում են քույր եկեղեցիների կամ այլ կրոնների տոները՝ հիշատակելով նաեւ դրանց նախորդող ծոմի մասին (օրինակ՝ Մոսկվա-

րից է: Մաղաքիա արք. Օրմանյանը գրում է, որ «ծոմը, իբրեւ պահքին յաւելուած», սահմանված է Առաջավորաց եւ Մեծ պահքերի յուրաքանչյուր յոթնյակի առաջին հինգ օրերին, շաբաթ եւ կիրակի օրերից բացի, իսկ մյուս պատերը ծոմ չունեն²¹: Եթե պահքը պարտադիր է քրիստոնյայի համար, ապա ծոմը կամավոր է²²:

ԾՈՄԸ ԺՈՂՈՎՐԴԱԿԱՆ ՏՈՆԱՑՈՒՅՑՈՒՄ

Հետ ուսումնասիրողները՝ ծոմը հայերենում փոխառյալ բառ է²³: Հայոց մեջ, լինելով համընդհանուր երեւույթ, ծոմ բառն ունի բարբառային տարբերակներ. ծում²⁴, ձում²⁵, զում/զում²⁶, ծոմ²⁷, փէհրիզ²⁸, փեհրիզ, օրուն²⁹, օրուշ (մահմեդականների ծոմ³⁰): Ուրֆայում Սբ. Սարգսի եռօրյա ծոմապահու-

յում տպագրված 1835 օրացույցում հուլիսի 2-ի համար սահմանված է. «Սրբոյն Զաքարիայ մարգարէին: Ռ. Այցելութիւն Սրբոյն կուսին (Հ. Ծոմ վասն առմանն Երուսաղէմի)»: Հ.-ն նշանակում է հունաց, Ռ.-ն՝ Ռուսաց (տե՛ս Օրացույց 1835 ամի Տեառն եւ ՌՄՁԴ Հայոց թուականի, ի Մոսկով, 1834, էջ 32):

²¹ Տե՛ս ՄԱՂԱՔԻԱ ԱՐՔ. ՕՐՄԱՆՅԱՆ, Հայոց Եկեղեցին, էջ 206, նույնի՝ Ծիսական բառարան, էջ 24:

²² Գ. ԱՂԱՆԵԱՆՑ, Կարգ աստուածապաշտութեան Հայաստանեայց ս. Եկեղեցւոյ, Թիֆլիզ, 1904, էջ 127, Հ. ՎԱՐԴԱՆ Վ. ՀԱՅՈՒՆԻ, Ճաշեր եւ խնճոյք..., էջ 410:

²³ Ծոմ բառն իր համարժեքներն ունի եբրայեցերենում՝ ձօմ, ասորերենում՝ սոմ, արաբերենում՝ սէվմ եւ այլ լեզուներում (տե՛ս Գ. ԱԻԵՏԻՔԵԱՆ եւ ուրիշներ, Նոր բառգիրք հայկազեան լեզուի, հտ. Ա., Վենետիկ, 1836, էջ 1023, ՀՐ. ԱՃԱՌՅԱՆ, Հայերեն արմատական բառարան, հտ. Բ., Երեւան, 1926, էջ 467, ԵՐՈՒԱՆԻ ՎՐԴ. ՏԷՐ-ՄԻՆԱՍԵԱՆՑ, Հայոց Եկեղեցւոյ յարաբերութիւնները ասորւոց եկեղեցիների հետ (հայկական եւ ասորական աղբիւրների համաձայն), Բ. հրատ., էջմիածին, 2009, էջ 36–37, ԱՆԴՐԱՆԻԿ Մ. ՎՐԴ. ԿՌԱՆԵԱՆ, նշ. աշխ., էջ 76):

²⁴ Մ. ԱՌԱՔԵԼՅԱՆ, Ռ. ՂԱՀՐԱՄԱՆՅԱՆ, Նմուշներ Լեոնային Ղարաբաղի ժողովրդական բանահյուսութիւնից, Երեւան, 1978, էջ 213, И. ОРБЕЛИ, Мокс и его обитатели, Избранные труды в двух томах, т. I, II, Ереван, 2002, էջ 255, ՀՀ ԳԱԱ Հնագիտութիւն եւ ազգագրութիւն ինստիտուտի արխիվ (այսուհետ՝ ՀԱԻ արխ.), Գ. ՀԱԼԱՋՅԱՆԻ ֆոնդ, Դերսիմի ազգագրութիւն, 1960, Յուլյակ 3, Գործ 20, էջ 2276:

²⁵ Ս. ՎԱՐԴԱՆՅԱՆ, Կրոնափոխ համընդհանրների բարբառը, բանահյուսութիւնը եւ երգարվեստը, Երեւան, 2009, էջ 202–203:

²⁶ ՍՏ. ՄԽԹԱՐԵԱՆ, Հայերէնէ թրքերէնի փոխառեալ բառեր, «Բիւրական», ԺՁ տարի, 1898, թիւ 45–46, 17 դեկտեմբեր, Կ. Պոլիս, էջ 789, Մ. ՔԷԼԵՇԵԱՆ, Սիւ-մատեան. Պատմական, բանասիրական, տեղագրական, ազգագրական եւ յարակից պարագաներ, Պէյրութ, 1949, էջ 452:

²⁷ Ա. ՍԱՐԳՍՅԱՆ, Ղարաբաղի բարբառի բառարան, Երեւան, 2013, էջ 321:

²⁸ Գ. ԱԻԵՏԻՔԵԱՆ եւ ուրիշներ, Նոր բառգիրք հայկազեան լեզուի, հտ. Ա., էջ 1023:

²⁹ ՄԱՆՈՒԷԼ ՎՐԴ. ԶԱԽՋԱԽԵԱՆ, Բառգիրք ի բարբառ հայ եւ իտալական, Վենետիկ, 1837, էջ 730:

³⁰ ԲԱՅԵԻ, Կայծեր, Մասն Բ., Երկերի ժողովածու, հտ. Ե., Երեւան, 1963, էջ 163:

թյունն անվանվել է ճկոտակ³¹: Ծոմ է կոչվում նաեւ չորպասը, որն առանց կաթնեղենի խիստ պահեցողություն է³²: Սակայն չորապահը կոչվում է նաեւ շաբաթապահքը³³: Ծոմ բառն ունի նաեւ հետեւյալ հոմանիշները՝ սուգ, կուրդ³⁴: Ուշագրավ է, որ սգո առիթներով ծոմապահության բազում օրինակներ կան Սբ. Գրքում, ինչպես նաեւ հայ միջնադարյան աղբյուրներում³⁵: Ծոմի մեջ լինելը բնորոշվում է ծոմապահել, ծոմել³⁶, ծում կենալ³⁷, ձում փեռնուլ³⁸ բառերով: Ծոմը բնորոշող բառեր են ծոմականը՝ ծոմի հատուկ³⁹, ծում լազգիմ՝ խիստ քչակեր⁴⁰, ծումվոր՝ ծոմը պահելու օրերին եկեղեցի գնացող եւ ծոմը պահող անձ⁴¹: Ծոմարձակ արմայա կիտեիմ արտահայտությունը նշանակում է Սբ. Սարգսի պահքի ընթացքում ամբողջ շաբաթ ծոմապահելուց հետո հաղորդվել⁴²: Ծոմբացի երթալ նշանակում է ծոմը լուծելու համար հացկերուլթի գնալ⁴³, իսկ ծոմբացումն էլ Սբ. Սարգսի պահքին երեք օր ծոմ պահող հարսնացուի ծոմը լուծելու համար նշանածի ընտանիքի կողմից ուղարկված քաղցրավենիքն է⁴⁴: Ծոմապահության շրջանը լրանալուց հետո առաջին անգամ ուտելը, կոչվել է խթում, խթել, խթում էնել⁴⁵, ծոմարձակ⁴⁶:

³¹ Ա. ՍԱՀԱԿԵԱՆ, Դիւցազնական Ուրֆան եւ իր հայորդիները, Պէյրուս, 1955, գլուխ Ժ., Ցաւելուածներ, Բառարան Ուրֆայի գաւառաբարբառի, էջ 45:

³² Տէս Հայոց լեզվի բարբառային բառարան (այսուհետ՝ ՀԼԲԲ), հտ. Դ., Երեւան, 2007, էջ 432: ՄԱՆՈՒԻԼ ՎՐԴ. ՋԱԽՋԱԿԵԱՆ, նշ. աշխ., էջ 730:

³³ ՀԼԲԲ, հտ. Դ., էջ 430: Շաբաթապահքը, մի քանի բացառություններով, տեւում է հինգ օր՝ երկուշաբթիից ուրբաթ (մանրամասն տես ՄԱՂԱՔԻԱ ԱՐՔ. ՕՐՄԱՆՅԱՆ, Ծիսական բառարան, էջ 32, Ա. ՂԱԶԱՐՅԱՆ, նշ. աշխ., էջ 844):

³⁴ Տէս ԵՐԵՄԻԱ ՄԵՂՐԵՑԻ, Բառգիրք Հայոց, քննական բնագիրը, առաջաբանը եւ ծանոթագրությունները՝ Հ. ԱՄԱԼՅԱՆԻ, Երեւան, 1975, էջ 153):

³⁵ Տէս, օրինակ, Հ. ՎԱՐԳԱՆ Վ. ՀԱՅՈՒՆԻ, Ճաշեր եւ խնճուղք..., էջ 446–447:

³⁶ ՊԵՏՐՈՍ ՎՐԴ. ԺԻՋՄԷՃԵԱՆ, Հայերէն աշխարհաբար լեզուի լիակատար բառարան, Հալէպ, 1957, էջ 634:

³⁷ Ա. ՍԱՐԳՍՅԱՆ, նշ. աշխ., էջ 321:

³⁸ Ս. ՎԱՐԳԱՆՅԱՆ, նշ. աշխ., էջ 202–203:

³⁹ ՊԵՏՐՈՍ ՎՐԴ. ԺԻՋՄԷՃԵԱՆ, նշ. աշխ., էջ 634:

⁴⁰ Ա. ՍԱՐԳՍՅԱՆ, նշ. աշխ., էջ 321:

⁴¹ Տէս ՀԼԲԲ, հտ. Բ., Երեւան, 2002, էջ 419:

⁴² Ա. Յ. ԱՅՎԱԶԵԱՆ, Յուշիկը բիւթանականը, Արկոտենէնն ու գաւառաբարբառը, «Մասիս», Կ. Պոլիս, 1888, թիւ 3909, էջ 441:

⁴³ Բալու. իր սովորոյթները, կրթական ու իմացական վիճակը եւ բարբառը (այսուհետ՝ Բալու...), աշխատասիրեց ՅԱՐՈՒԹԻՆ ՔԷՆՅ. ՍԱՐԳԻՍԵԱՆ (Ալեւոր), Գահիրէ, 1932, էջ 439:

⁴⁴ Կ. ԳԱԲԻԿԵԱՆ, Բառգիրք Սեբաստահայ գաւառալեզուի, Երուսաղէմ, 1952, էջ 278:

⁴⁵ ՎԱՃԱՆ. ՎՐԴ. ՏԵՐ-ՄԻՆԱՍԵԱՆ, Անգիր գպրութիւն եւ հին սովորոյթներ, հտ. Բ., Կ. Պոլիս, 1904, էջ 18: Բալու..., էջ 425, ՀԱԻ արիս., Գ. ՀԱՆԱՋՅԱՆԻ Ֆոնդ, էջ 2260–2261:

⁴⁶ Ա. Յ. ԱՅՎԱԶԵԱՆ, նշ. աշխ., էջ 441:

Ծոմը խախտելը բնորոշվել է ծում խոտ⁴⁷, ծոմը բացել⁴⁸, ծոմը կոտրել⁴⁹, ծոմը խոռել բառերով⁵⁰:

Ծոմի տեսակները: Ինչպես եկեղեցական ավանդույթի համաձայն է ծոմը պահքի խիստ տեսակ, նույնն է ժողովրդական ընկալումներում, ինչը փաստվում է ԺԹ. դարի կեսերի Ի. դարասկզբի ազգագրական սկզբնաղբյուրներով: Ժողովրդի տոնածիսական կյանքում եղել է երկու տեսակի ծոմապահություն. առաջինը՝ միաժամ⁵¹ (նաեւ ծոմապահ⁵², ամժում⁵³), որի ժամանակ օրվա ընթացքում մեկ անգամ՝ կեսօրին կամ երեկոյան սնվել են պահոց կերակուրներով եւ ջուր խմել: Ուշագրավ է, որ քրիստոնեության վաղ շրջանում նույնպես ծոմապահությունը ենթադրել է սննդից եւ ջրից հրաժարում առավոտից մինչեւ երեկո, որից հետո թույլատրվել է պահքի սնունդ ընդունել՝ սնվելով օրական մեկ անգամ: Ժամանակի ընթացքում ծոմի օրերին երեկոյան ժամերգությունն սկսել է կատարվել կեսօրին մոտ⁵⁴: Ներսես արք. Մելիք-Թանգյանը Բ. Առաքելական կանոնների ԾԹ. կանոնը մեկնաբանելիս գրում է, որ շաբաթ եւ կիրակի օրերը ծոմ պահելը մինչեւ Պատարագն էր, հետո թույլատրվում էր պա-

⁴⁷ ՀԱԻ արխ., Գ. ՀԱԼԱՋՅԱՆԻ ֆոնդ, էջ 2276:

⁴⁸ Պ. ԲԵԳԻՐՅԱՆ, Հայերեն դարձվածքների ընդարձակ բացատրական բառարան, Երեւան, 2011, էջ 632:

⁴⁹ Ա. ՍՈՒՔԻԱՅԱՆ, Հայոց լեզվի դարձվածաբանական բառարան, Երեւան, 1975, էջ 305:

⁵⁰ Ռ. Կ. ՍԱՔԱՊԵՏՈՅԱՆ, Կրոնա-եկեղեցական եւ ծիսական բառերը արեւմտահայերենում, էջմիածին, 2003, Ժ.-ԺԱ., էջ 103:

⁵¹ Ժում նշանակում է անգամ (տե՛ս ՀԼԲԲ, հտ. Բ., էջ 163): Միաժամը նշանակում է նաեւ ծոմ, օրվա ընթացքում մեկ անգամ ուտելը (տե՛ս ՀԼԲԲ, հտ. Դ., էջ 54, Ն. ՄԱՄԻԿՈՆՅԱՆ, Հազարից մեկը, վեպ, Թիֆլիս, 1893, էջ 239): Միաժամը հայտնի է Արարատում, Մուշում, Կարսում, Խարբերդում, Զմյուռնիայում (տե՛ս ՀԼԲԲ, հտ. Դ., էջ 54), Զավախքում (տե՛ս Ն. ԼԱԼԱՅԱՆ, Զավախք, Նշանաւոր տօներ, Ազգագրական հանդէս (այսուհետ՝ ԱՀ), գք. Բ., Թիֆլիս, 1897, էջ 250), Սիսիանում (տե՛ս Ն. ԼԱԼԱՅԱՆ, Սիսիան. նիւթեր ապագայ ուսումնասիրութեան համար, Նշանաւոր տօներ, ԱՀ, գք. Դ., Թիֆլիս, 1898, №1, էջ 250), Աշտարակում (տե՛ս Պ. ՊՈՒՇՅԱՆ, Սոս եւ Վարդիթեր, Երեւան, 1987, էջ 310–311), Ներքին Բասենում (տե՛ս Գ. ՀԱՊՈՅԱՆ, Ներքին Բասենի ազգագրությունը եւ բանահյուսությունը, Երեւան, 1974, էջ 227), Թալինի ներքին Բազմաբերդ գյուղում (տե՛ս Հ. ԽԱՌԱՅԱՆ, Տոնը եւ տոնահանդեսի մշակույթը Հայաստանում, Երեւան, 2009, էջ 130):

⁵² Ծոմապահը Երեւանի բարբառում նշանակում է օրական միայն մեկ անգամ ոչ մսային եւ յուղային կերակուր ուտելը (տե՛ս ՀԼԲԲ, հտ. Բ., էջ 419):

⁵³ Անժումը որոշ բարբառներում նշանակում է անժամանակ (տե՛ս, օրինակ, Հ. Յ. ՀՈՒՆՈՒՆՅԱՆ, Հ. Մ. ՀԱՃԵԱՆ, Յուշամատեան Խոտորջուրի, Վիեննա, 1964, էջ 428, ՀԼԲԲ, հտ. Ա., Երեւան, 2001, էջ 59):

⁵⁴ Տե՛ս Մ. ՕՐՄԱՆՅԱՆ, Հայոց եկեղեցին, էջ 205–206: Ծոմը լուծելու ժամանակի մասին տե՛ս նաեւ ՎԱՐԳԱՆ ՀԱՅՈՒՆԻ, Ճաշեր եւ խնճոյք..., էջ 418–420:

սը լուծել գինով, ձեթով եւ կերակրով եւ մինչեւ երեկո անօթի չմնալ⁵⁵: Այսինքն՝ օրվա ընթացքում ծոմապահության ժամկետը կրճատվել է: Կեսօրին կամ երեկոյան սնվելու հանգամանքով կարելի է բացատրել միաժամ ծոմն անժում, այսինքն՝ անժամանակ, անվանելը:

Մյուսն անսվաղ ծոմապահությունն է, որի ընթացքում միայն ջուր են խմել⁵⁶:

Սակայն հանդիպում է ծոմապահության տեսակ, որի ընթացքում նաեւ ջրից են հրաժարվում: Այն պահում են Սբ. Սարգսի պահքի ուրբաթ օրը, եւ հանդիպում է գրեթե ամենուր, հատկապես երիտասարդների շրջանում: Վերջիններս ողջ օրը ջուր չեն խմում, իսկ երեկոյան աղի բլիթ («շոռ կուկու»⁵⁷) են ճաշակում՝ երազում ապագա կողակցից ջուր ստանալու ակնկալիքով: Որոշ վայրերում չորեքշաբթի երեկոյից սկսած մինչեւ ուրբաթ երեկո⁵⁸, իսկ որոշ վայրերում՝ ամբողջ շաբաթ⁵⁹ երիտասարդները ջուր չեն խմել՝ ցանկալի երազը տեսնելու ակնկալիքով:

Վերը տեսանք, որ եկեղեցական ավանդույթի համաձայն՝ ծոմը հրամայվում է միայն Առաջավորաց պահքին եւ Մեծ պահքի ընթացքում՝ բոլոր երկուշաբթի-ուրբաթ օրերին: Ուշագրավ է, որ հայոց ավանդական կենցաղում եւս ծոմապահության ամենատարածված ժամկետները եղել են Առաջավորաց եւ Մեծ պահքերի շրջանները: Սակայն ծոմապահություն հանդիպում է նաեւ Սբ. Ծննդյան, Վարդավառի, Սբ. Հակոբի եւ տաղավար տոներին նախորդող պահքերի ընթացքում եւ այլ տոնածիսական ժամկետներում ու կենցաղային դրվագներում: Թեեւ այս տոներին նախորդող պահքերի ընթացքում եկեղեցական ավանդույթը ծոմ չի հրահանգում, սակայն «Սբերիանոսի ի Ղուկայ Աւետարանին Մեկնութենէ բան Ա.» Կանոն Ա.-ն (ԺԱ. դ.) Սբ. Ծնունդից առաջ ընկած ութօրյա ծոմապահու-

⁵⁵ Տէս ՆԵՐՍԷՍ ԱՐՔ. ՄԵԼԻՔ-ԹԱՆԳՅԱՆ, Հայոց եկեղեցական իրավունքը, էջմիածին, 2011, էջ 100:

⁵⁶ Տէս ԽՈՒՓՍԵՅԻ, Ս. Սարգսի պահքը Քղիի մէջ, «Բիւրակն», Կ. Պոլիս, ԺԶ. տարի, թիւ 8, 1898, փետրվարի 5, էջ 122, Ս. Խ. ՏԵՕՎԼԵԹԵԱՆ, Յուշեր Շապին Գարահիսարէն, Փարիզ, 1954, էջ 39, ԳՐ. ԳԱԼՈՒՍՏԵԱՆ, Մարաշ կամ Գերմանիկ եւ Հերոս Զէյթուն, Բ. հրատ., Նիւ Եորք, 1988, էջ 334, Ս. ՄԿՏԶԵՅԱՆ, Հայոց տոնածիսական մշակույթ, Երեւան, 2016, էջ 42:

⁵⁷ Ե. ԿԱՐԱՊԵՏՅԱՆ, Սասուն, Ազգագրական հետազոտություններ, Երեւան, 1962, էջ 123:

⁵⁸ Մ. ԳԱՆԻԷԼԵԱՆ, Ս. Սարգսի պահքը Խիանի մէջ, «Բիւրակն», Կ. Պոլիս, 4 հուլիսի, 1900, էջ 406, ՎԱՀԱՆ ՎՐԳ. ՏԵՐ-ՄԻՆԱՍԵԱՆ, Անգիր դպրութիւն եւ հին սովորոյթներ, հտ. Բ., Կ. Պոլիս, 1904, էջ 50-51:

⁵⁹ Երգեր, առակներ, հանելուկներ, թերահաւատութիւններ... Խոտրջրոյ, հաւաքեց Հ. Մ. Հ. ԳԱՆԱԲԱՅԻ, Տփլիս, 1904, էջ 130:

թյան մասին է խոսում⁶⁰, իսկ Դավիթ Ալավկա Որդին (ԺԱ.—ԺԲ. դդ.) իր «Կանոնական օրինադրություն» աշխատության Դ. կանոնում Սբ. Ծննդյանը, Զատիկին եւ Վարդավառին նախորդող երեք հիսնականների ընթացքում նաեւ ծոմ պահել է հորդորում⁶¹:

Ծով՝ Առաջավորաց պահքի ընթացքում կամ Սբ. Սարգսի ծոմ: Վերը տեսանք, որ ծոմը հիշատակող կանոնները թվագրվում են Զ. դարի կեսերից սկսած՝ հասնելով մինչեւ ԺԲ. դարը (Սահակ Ա. Պարթևից մինչեւ Դավիթ Ալավկա Որդի), սակայն դրանցում Առաջավորաց պահքի ծոմը չի հիշատակվում այն դեպքում, երբ այդ պահքը մեզանում հաստատվել է դեռեւս Ե. դարում՝ Տօնացոյցի երկրորդ՝ Հովհան Ա. Մանգակունու կատարած խմբագրությունում⁶²: Առաջավորացը նախորդում է Սբ. Սարգսի հիշատակի օրվան⁶³: Վերջինս սահմանել է Հովհան Գ. Օձնեցին⁶⁴, եւ նշվում է հունվարի 18-ից մինչեւ փետրվարի 23-ն ընկած շրջանում⁶⁵: Ժողովրդական տոնացույցում Առաջավորաց պահքը հայտնի է նաեւ Սբ. Սարգսի պաս, Զոր պաս, Սբ. Սարգսի ծոմ, Փետրվարի ծոմ⁶⁶, Խաշիլի պաս⁶⁷, իսկ մատենագրության մեջ՝ նաեւ Նինվեացվոց պահք⁶⁸

⁶⁰ Տե՛ս Կանոնագիրք հայոց, հտ. Բ., էջ 288–289: Կանոնն առկա է Կանոնագիրք ԺԱ. դարի խմբագրության մեջ (տե՛ս անդ, էջ XXVIII):

⁶¹ Տե՛ս Ա. ԱՐԲԱՆԱՅԱՆ, Դավիթ Ալավկա Որդու կանոնները, «Էջմիածին», 1953, Գ., էջ 54–55:

⁶² Տե՛ս Ռ. ՎԱՐԳԱՆՅԱՆ, նշ. աշխ., էջ 106, 616–617: Ազաթանգեղոսի «Պատմություն Հայոց»-ում հիշատակվում է վաթսուներեցօրյա պահք՝ Հովհաննիսյանց վկայարանները կառուցելուց եւ Տրդատ արքային ու այլ ախտահարվածներին բժշկելուց առաջ, եւ մեկամսյա պահք՝ մկրտությունից առաջ՝ (տե՛ս Ա. ԳԱԹՆԱԳԵՂՈՍ, Հայոց պատմություն, աշխարհաբար թարգմանությունը եւ ծանոթագրությունները՝ Ա. ՏԵՐ-ՂԵՆՈՆԳՅԱՆԻ, Երեւան, 1983, էջ 408, 462): Սբ. Սարգսի վկայաբանությունը շարադրել է Ներսես Շնորհալին, ով նույնպես ծոմ չի հիշատակում (տե՛ս Պատմություն վարուց Սրբոյն Սարգսի զօրավարի, թարգմանեալ ի ՆԵՐՍԻՍԷ ՇՆՈՐՀԱՆՈՅ, Վենետիկ, 1854, էջ 11–53): Առաջավորաց հնգօրյա անսվաղ պահքը Գրիգոր Լուսավորչին վերագրելը սկսվել է Զենոբ Գլակից, ում հետեւել են մյուս պատմիչները (տե՛ս ՎԱՐԳԱՆ ՀԱՅՈՒՆԻ, Ժաշեր եւ խնճոյք..., էջ 438–439):

⁶³ Եկեղեցական ծիսակարգի համաձայն՝ սրբերի համար սահմանված է ոչ թե տոն, այլ հիշատակի օր: Սակայն քանի որ հոգվածն ազգագրական բնույթի է, ուստի հիշատակի օրվան զուգահեռ՝ օգտագործում ենք նաեւ ժողովրդական տարբերակը, այն է՝ Սբ. Սարգսի կամ Սբ. Հակոբի տոն:

⁶⁴ Տե՛ս Ռ. ՎԱՐԳԱՆՅԱՆ, նշ. աշխ., էջ 201, 432–433:

⁶⁵ Տե՛ս Ս. ՄԿՐՏՁՅԱՆ, նշ. աշխ., էջ 38:

⁶⁶ Հ. ԽԱՌԱՅՅԱՆ, Տոնը եւ տոնահանդեսի մշակույթը Հայաստանում, էջ 133:

⁶⁷ Ե. ԼԱՒԱՅՅԱՆ, Վարանդա. Նշանաւոր տօներ, ԱՀ, գք. Գ., էջ 340, Ե. ԼԱՒԱՅՅԱՆ, Գանձակի գաւառ, ԱՀ, գք. Զ., Թիֆլիս, 1900, էջ 363–364:

⁶⁸ Տե՛ս Ռ. ՎԱՐԳԱՆՅԱՆ, նշ. աշխ., էջ 433, 619, 622, Տօնապատճառ ժողովածու, էջ 281–286: Նինվեացիների պահք անվանումը կապված է այն բանի հետ, որ Առաջավորաց պահքի

անվանումներով: Սբ. Սարգսի պահգին պահել են թե՛ միաժուռ, թե՛ անսվաղ ծոմ:

Առաջավորաց պասի հինգ օրերին պաս պահելը համընդհանուր է եղել, սակայն այդ ընթացքում ծոմապահության ժամկետները տարբեր են եղել՝ ա) ծոմապահություն ամբողջ շաբաթվա ընթացքում, բ) ծոմապահություն շաբաթապասի առաջին երեք օրերին, գ) ծոմապահություն շաբաթապասի վերջին երեք օրերին:

Հայոց որոշ ազգագավառներում ծոմն սկսել են կիրակի երեկոյան, տեւել է մինչև չորեքշաբթի երեկո, կամ, ընդհակառակը, սկսել են չորեքշաբթի առավոտյան եւ շարունակել մինչև շաբաթ առավոտ, այսինքն՝ երեք օր⁶⁹: Չնքուշում, օրինակ, թե՛ եռօրյա, թե՛ հնգօրյա ծոմն է տարածված եղել: Սբ. Սարգսի պահոց շաբաթին շատերը, մանավանդ ամուրի աղջիկները, եռօրյա, ոմանք մինչև հնգօրյա միաժուռ (երկուշաբթի առավոտից կամ կիրակի կեսգիշերից մինչև ուրբաթ կեսգիշեր) ծոմ են պահել⁷⁰: Դերսիմում էլ երեքից վեց, նաեւ՝ յոթ օր են ծոմ պահել⁷¹: Սբ. Սարգսի պասին յոթնօրյա ծոմապահություն նաեւ Իջեւանում է եղել. «Սըփ Սարքսին յոթ օր սոված կենին, հաց չի ուտին»: Իսկ ութերորդ օրը՝ երեկոյան, աղջիկները եւ տղաներն պետք է աղաբլիթ ուտեին⁷²: Ենթադրելի է, որ խոսքը նույն հնգօրյա ծոմապահության մասին է, սակայն յոթնօրյա է կոչվել, քանի որ սկսվել է ոչ թե Առաջավորաց պասի երկուշաբթիից, այլ դրան նախորդող կիրակի երեկոյից եւ ավարտվել շաբաթ օրն առավոտյան՝ Սբ. Սարգսի տոնի պատարագից

ուրբաթ օրը նինվեացիների հիշատակի օրն է (այս մասին տե՛ս Ռ. ՎԱՐԳԱՆՅԱՆ, նշ. աշխ., էջ 201, 432–433):

⁶⁹ Տե՛ս Հ. ԽԱՌԱՅՅԱՆ, Հայ ժողովրդական տոները, Երեւան, 2005, էջ 65–66:

⁷⁰ Գ. ԳԵՈՐԳԵԱՆ, Չնքուշապատում. քննական պատմութիւն հայոց Չնքուշի, Տեղագրական-պատմագրական-մշակութային-բանահիւսական-ազգագրական, հտ. Ա., Երուսաղէմ, 1970, էջ 435, 466:

⁷¹ Գ. Ս. ԵՐԵԱՆՅԱՆ, Պատմութիւն Չարսանճագի հայոց, Պէյրուիթ, 1956, էջ 79, 83: Լ. Սիմոնյանը, համեմատելով Սբ. Սարգսի վկայաբանության ներսես Շնորհալու եւ Հայսմավուրքի պատումները, գրում է, որ Հայսմավուրքում սրբի վարքի վերաբերյալ ավելացված են որոշ մանրամասներ, ի թիվս որոնց՝ հնգօրյա եւ յոթնօրյա ծոմապահությունը (տե՛ս Լ. ՍԻՄՈՆՅԱՆ-ՄԵԼԻՔՅԱՆ, Տոմարային ծիսաշար, հտ. Բ., Սբ. Սարգիս, Տըրնդեզ, Բարեկենդան, Երեւան, 2007, էջ 9): Յոթ օր ծոմ պահելու մասին ավանդազրույցը տե՛ս Ս. ՀԱՐՈՒԹՅՈՒՆՅԱՆ, Սբ. Սարգիսը ժողովրդական բանավոր ավանդության մեջ, «Սբ. Սարգիս» նստաշրջանի նյութեր, խմբագիրն էր՝ Ս. ՀԱՐՈՒԹՅՈՒՆՅԱՆ, Ա. ՔԱԼԱԹԱՐՅԱՆ, Երեւան, 2002, էջ 34:

⁷² Է. ԽԵՄՅՅԱՆ, Իջեւան (Չորոփոր), «Հայ ազգագրություն եւ բանահյուսություն» մատենաշար (այսուհետ՝ ՀԱԲ), պր. 25, Երեւան, 2008, էջ 359:

հետո: Հանգիպում է նաեւ երկօրյա ծոմապահություն, որը չորեքշաբթի է լուծվել: Առաջավորաց պահքի երեքշաբթի օրվանից սկսյալ, հատկապես այն աղջիկները, որոնք բարի խըսմէքի են ապասել, մինչեւ չորեքշաբթի օրը ծոմ են պահել⁷³: Ուշագրավ է, որ ծոմն առավոտից կամ երեկոյից սկսելու ժողովրդական այս սովորույթը իր համարժեքն ունի նաեւ եկեղեցական ծիսակարգում՝ կապված տարբեր պահքերի եւ տոների եւ առհասարակ՝ եկեղեցական օրվա սկզբի հետ: Վերջինս միջնադարում այն ծիսական խնդիրներից է եղել, որոնք արծարծվել են միջեկեղեցական տարաձայնություններում⁷⁴:

Ամբողջ շաբաթ միաժողով կամ անսվաղ ծոմ են պանել Գյումրիում⁷⁵, Զավախքում⁷⁶, Մուշում⁷⁷, Սիսիանում⁷⁸, Վարանդայում⁷⁹, Խիանում⁸⁰, Ապարանում⁸¹, Բորչալուում⁸², Թալինում⁸³, Խոտորչուում⁸⁴, Ակնում⁸⁵, Դերսիմում⁸⁶ եւ այլուր: Փերիայում աղջիկները եւ կտրիճներն իրենց մուսափն հասնելու համար Սբ. Սարգսի պատի շաբաթը, սովորաբար երկուշաբթիից մինչեւ շաբաթ օրը, ծոմ են պահել, իսկ հետո հաղորդվել են⁸⁷: Քղիում Սբ. Սարգսին շաբաթական ծոմ են պահել ոմանք՝ մինչեւ ցերեկ, ոմանք՝ մինչեւ երեկո, ոմանք էլ ողջ շաբաթվա մեջ միայն մեկ օր են կերել⁸⁸:

⁷³ Ա. ԱԼՊՅԱՃԵԱՆ, Պատմութիւն հայ Կեսարիոյ (տեղագրական, պատմական եւ ազգագրական ուսումնասիրութիւն), հտ. Բ., Գահիրէ, 1937, էջ 1761:

⁷⁴ ԿԻՐԱԿՈՍԻ ՎԱՐԳԱՊԵՏԻ ԵՐԶՆԿԱՅԻՈՅ Թուղթ առ կարնեցիս, աշխատասիրութեամբ ԱԻԵՏԻՍ ՔԶՆՅ. ԴԱՆԻԷԼԵԱՆԻ, «Գանձասար», 1996, Զ., էջ 573, Հ. Պ. ԷՍԱՊԱԼԵԱՆ, Դիոնեսիոս Բարսալիբիի հակաճառութիւնը հայոց դէմ, «Հանդէս Ամսօրեայ», Վիեննա, 1937, թիւ 6–8, էջ 312–318, ԱՆԴՐԱՆԻԿ Ե. ՎՐԴ. ԿՈՒՆԵԱՆ, նշ. աշխ., էջ 327:

⁷⁵ Յ. ԽՈՋԱՅԵԱՆՅ, Գիւմրի, «Արարատ», էջմիածին, 1871, փետրվար, էջ 346:

⁷⁶ Ե. ԼԱԼԱՅԱՆ, Զաւախք, Հաւատք. պատերը, ուխտ, ուխտագնացութիւն, ԱՀ, գր. Ա., Շուշի, 1895, էջ 371, Ե. ԼԱԼԱՅԱՆ, Զաւախք. Նշանաւոր տօներ, ԱՀ, գր. Բ., էջ 250:

⁷⁷ ԻԳԻԹԲԱՇԵՐ, Ս. Սարգսի տօնը Մշոյ հայերի եւ քիւրդերի մէջ, «Արձագանք», Թիֆլիս, 1895, թիւ 18, էջ 2:

⁷⁸ Ե. ԼԱԼԱՅԱՆ, Սիսիան. Նիւթեր ապագայ ուսումնասիրութեան համար, գր. Գ., էջ 250:

⁷⁹ Ե. ԼԱԼԱՅԱՆ, Վարանդա. Նշանաւոր տօներ, ԱՀ, գր. Գ., էջ 340:

⁸⁰ Մ. ԴԱՆԻԷԼԵԱՆ, նշ. աշխ., էջ 404–406:

⁸¹ Ս. ՄԱՀՏԵՍԻ-ԻՍԱՀԱԿԵԱՆ, Ապարանի ներկայ վիճակը, «Մուրճ», Թիֆլիս, 1901, N 10, էջ 53:

⁸² Ե. ԼԱԼԱՅԱՆ, Բորչալուի գաւառ. Նշանաւոր տօներ, ԱՀ, գր. Ժ., Թիֆլիս, 1903, էջ 256:

⁸³ Ռ. ԽԱՋԱՏՐՅԱՆ, Թալին, ՀԱՐ, պր. 19, Երեւան, 1999, էջ 240:

⁸⁴ Հ. Յ. ՀՈՒՐՈՒՆԵԱՆ, Հ. Մ. ՀԱՃԵԱՆ, նշ. աշխ., էջ 157:

⁸⁵ Վ. ԲԳՅԱՆ, Երկրագործական մշակույթը Հայաստանում, Երեւան, 1972, էջ 445:

⁸⁶ ՀԱԻ արխ., Գ. ՀԱԼԱՋՅԱՆԻ Ֆոնդ, էջ 1245, 1248:

⁸⁷ Ա. ԵՐԵՄԵԱՆ, Սպահանի Փէրիա գաւառը (Ազգագրութիւն), Նոր-Ջուղա, 1919, էջ 116:

⁸⁸ ԽՈՒՓՅԵՅԻ, նշ. աշխ., էջ 122:

Հանդիպում է նաեւ շաբաթական անսվաղ ծոմապահության, որը շուրջաբթի ընդհատվում է՝ եկեղեցի գնալով, ապա պահոց կերակուրներ ուտելով եւ հինգշաբթիից սկսած՝ շարունակվում է՝ ավարտվելով շաբաթ օրը՝ հաղորդություն ստանալով⁸⁹։ Հարկ է նշել, որ եկեղեցական ծիսակարգում պահքերի, նաեւ՝ Առաջավորաց պահքի ընթացքում սննդային պահքը չի լուծվում, իսկ ծիսական պահքը լուծվում է, եթե զուգահեռվում է Տերունական կամ սրբերի տոնի⁹⁰։

Հանդիպում է մի քանի դրվագ, որտեղ գուշակության ծեսը եւս չորեքշաբթի է կատարվել։ Բուլանըխում Սբ. Սարգսի շաբաթական պասի առաջին երեք օրերին ազապ տղաները եւ աղջիկները մինչեւ երեկո միաժում ծոմ են պահել, ապա աղի բաղարջ են կերել՝ երազում ապագա կողակցից ջուր ստանալու իղձով⁹¹։ Ուշագրավ է, որ ասորիների Նինվեացվոց պահքը համընկնում է հայոց Առաջավորաց պահքին։ Նինվեացվոց պահքի առաջին երեք օրերը Մըբիեթթայի՝ ծոմի օրեր են, որի ժամանակ նաեւ ջուր չեն խմում⁹²։ Ժամկետային այս համընկնումը եւ ծոմ բառի՝ ասորական ծագման մասին տեսակետը (ինչպես ծիսական մի շարք այլ բառեր)⁹³, հայկական եւ ասորական ծոմապահքերի միջեւ ընդհանրություններ տեսնելու տեղիք են տալիս։

Որոշ վայրերում եռօրյա ծոմ են պահել շաբաթվա սկզբում կամ վերջին⁹⁴։ Եզդիները նույնպես Սբ. Սարգսի պահոց մեջ երեք օր ծոմ (ռոժի⁹⁵) են պահել⁹⁶։

⁸⁹ Տէս, օրինակ, ԽՈՒՓՍԵՑԻ, նշ. աշխ., էջ 122։

⁹⁰ Տէս ՄԱՂԱՔԻԱ ԱՐՔ. ՕՐՄԱՆՅԱՆ, Ծիսական բառարան, էջ 36։

⁹¹ ԲԵՆՍԷ, Բուլանըխ կամ Հարք գաւառ, Աստուածութիւն եւ սրբեր, ԱՀ, գք. Զ., էջ 22, ԱԱՀԱԿ ՄՈՎՍԻՍՅԱՆ (ԲԵՆՍԷ), Հարք (Մշո Բուլանըխ), ՀԱԲ, պր. 3, Երեւան, 1972, էջ 43։

⁹² Այս տեղեկությունը մեզ հաղորդեց Հայաստանում Արեւելքի Ասորական եկեղեցու իոզեփոր առաջնորդ Տեր Նիկողոսիմ քահանա Յուխանաւեր։

⁹³ Տէս ԵՐՈՒԱՆԿ ՏԷՐ-ՄԻՆԱՍԵԱՆՅ, նշ. աշխ., էջ 36–37։

⁹⁴ Տէս, օրինակ, Վ. ՀԱՄԲԱՐՁՈՒՄԵԱՆ, Գիւղաշխարհ, պատմական, ազգագրական ուսումնասիրութիւն, Փարիզ, 1927, էջ 155, Ա. ԱԼՊՅԱՃԵԱՆ, Պատմութիւն հայ Կեսարիոյ, հտ. Բ., էջ 1748, Բ. ԺԱՄԿՈՋԵԱՆ, Հայնի. տեղագրական, ազգագրական. պատմագրական, Պէյրութ, 1951, էջ 81, Կ. ԳԱԲԻԵԱՆ, նշ. աշխ., էջ 277–278, Պատմագիրք յուշամատենան Սեբաստիոյ եւ գաւառ հայութեան, հտ. Բ., կազմեց ԱՌԱՔԵԼ Ն. ՊԱՏՐԻԿ, Նիւ Ճըրզի, 1983, էջ 138։ Եռօրյա ծոմ հաստատելու մասին ավանդազրույցը տես Ս. ՀԱՐՈՒԹՅՈՒՆՅԱՆ, նշ. աշխ., էջ 33։

⁹⁵ Ս. ՄԿՐՏՁՅԱՆ, նշ. աշխ., էջ 44։

⁹⁶ ԲԵՆՍԷ, Բուլանըխ կամ Հարք գաւառ, Աստուածութիւն եւ սրբեր, ԱՀ, գք. Զ., էջ 23։

Առաջավորաց պասի առաջին երեք օրերին ծոմ պահել են Ղարադաղում⁹⁷, Զեյթունում⁹⁸, Բուլանըխում⁹⁹ եւ այլուր: Բյութանիայում ծոմարձակ են եղել Առաջավորաց պասի չորեքշաբթի կեսօրին¹⁰⁰: Էվէրէկ-Ֆէնէսէի կանայք, աղջիկները ծոմ են պահել երեք օր, մինչեւ չորեքշաբթի, իրենց խնդրածի կատարման համար¹⁰¹:

Ծոմապահությունը եղել է նաեւ Առաջավորաց պահքի վերջին երեք օրերին՝ չորեքշաբթի երեկոյից մինչեւ շաբաթ առավոտ, եւ լուծվել է Սբ. Սարգսի տոնի օրը՝ պատարագին մասնակցելուց հետո Հաղորդություն ստանալով: Այդպիսի օրինակներ հանդիպում են Պաշպուրթում¹⁰², Սասունում¹⁰³, Քդիում¹⁰⁴ եւ այլուր: Սալմաստում Առաջավորաց պահքի վերջին երեք օրերին՝ չորեքշաբթի, հինգշաբթի, ուրբաթ, ծոմ են պահել, վերջին օրվա երեկոյին փոխինդ են կերել, իսկ շաբաթ առավոտյան Հաղորդություն վերցրել¹⁰⁵: Եւգոկիայում Սբ. Սարգսի պահքի վերջին երեք օրերին աղջիկները ծոմ են պահել եւ շաբաթ առավոտ Սբ. Հաղորդություն են ստացել¹⁰⁶: Խիանում հնուց եկած սովորության համաձայն, երեք-չորս տարեկան աղջիկներն ու տղաները Սբ. Սարգսի պահքի հինգշաբթի երեկոյան ուտելուց հետո ծոմ բերան են մնացել, մինչեւ շաբաթ առավոտ¹⁰⁷: Բարջանճում եւս վերջին երեք օրերին տանտիկիները ծոմ են պահել եւ հացի առատության հետ կապված գուշակություն արել¹⁰⁸:

Ծոմբացի ավանդույթները: Սբ. Սարգսի պահքի ընթացքում ծոմից դուրս գալու արարողությունն առանձնահատուկ է եղել երիտասարդների, մասնավորաբար՝ նշանված աղջիկների համար: Այն եղել է չորեքշաբթի կամ շաբաթ: Փեսացուի տանից հարսնացուները ծովափ են ստացել, որը բաղկացած է եղել համադամ կերակուրներից (օրինակ՝ հացեծվա-

⁹⁷ ԲԱՖՖԻ, *Խաչագողի հիշատակարանը*, Երկերի ժողովածու, հտ Բ, Երեւան, 1962, էջ 565:

⁹⁸ Մ. ՍԻՍԵՌԵԱՆ (Մ. ՈՒԼՆԵՅԻ), *նշ. աշխ.*, էջ 202:

⁹⁹ ՍԱՀԱԿ ՄՈՎՍԻՍՅԱՆ (ԲԵՆՍԷ), *Հարք (Մշո Բուլանըխ)*, էջ 43:

¹⁰⁰ Ա. Յ. ԱՅՎԱԶԵԱՆ, *նշ. աշխ.*, էջ 441:

¹⁰¹ *Հիշատակարան էվէրէկ-Ֆէնէսէի, հաւաքեց Ա. Գրիգորեան, աշխատասիրեց Ս. ԳԱՐԱԿԵՕՋԵԱՆ, Փարիզ, 1963, էջ 494:*

¹⁰² ՎԱՀԱՆ ՎՐԳ. ՏԷՐ-ՄԻՆԱՍԵԱՆ, *նշ. աշխ.*, էջ 50:

¹⁰³ Ե. ԿԱՐԱՊԵՏՅԱՆ, *նշ. աշխ.*, 1962, 204 էջ:

¹⁰⁴ ԽՈՒԹՅԵՅԻ, *նշ. աշխ.*, էջ 122–123:

¹⁰⁵ Ա. ԱԹԱՅԵԱՆ, *Սալմաստ, Նոր Զուղա*, 1906, էջ 182:

¹⁰⁶ Ա.ԱԼՊԵՏԱՅԵԱՆ, *Պատմութիւն Եւգոկիոյ Հայոց, Գահիրէ, 1952, էջ 1526:*

¹⁰⁷ Մ. ԴԱՆԻԷԼԵԱՆ, *նշ. աշխ.*, էջ 406:

¹⁰⁸ ՄԱՆՈՒԿ Պ. ԾԵՐՕՆ ԲԱՐՋԱՆՃՅԻ, *Բարջանճ գիւղ. համայնապատում (1600–1937)*, Պոստոն, 1938, էջ 125:

ծեղ), քաղցրավենիքից (հիմնականում՝ ռուպով պատրաստված հալվա, հայրա՝ մեղրաձրով ըմպելիք) եւ նվերից: Ստացված ուտեստով հարսնացուի տանը աղջիկ-ժողոտանք՝ աղջիկների հավաքույթ է կազմակերպվել¹⁰⁹: Խիանում միաժամ ծոմ պահող երիտասարդներին չորեքշաբթի երեկոյան՝ ժամերգությունից հետո, այցելել են ազգականները, կերակուր տարել, շնորհավորել, ծոմը շարունակելու կարողություն եւ սրտի փափագի իրականացում մաղթել¹¹⁰:

Ծոմը լուծվել է կամ այլուրի (հացահատիկի) հումքով պատրաստված քաղցրավենիք ուտելով, կամ ջուր խմելով, կամ մատաղով, կամ եկեղեցական հաղորդությամբ:

ա) Ծոմբաց՝ ծիսական ուտեստով: Հայտնի է, որ փոխինդը եւ դրանով պատրաստված խաշիլը Սբ. Սարգսի տոնին բնորոշ ուտեստներին էին¹¹¹: Բարեպաշտ մամիկները, կանայք, աղջիկները Սբ. Սարգսի պահքի առաջին երեք օրերը՝ կիրակի կեսգիշերից մինչեւ չորեքշաբթի երեկո, ծոմ են պահել, եւ օրական երեք անգամ քառասունական ծնրադրում արել ու աղոթել (Քառասնից մանկանց տոնի ծնրադրության ծեսն է հիշեցնում¹¹²—Հ. Ա.): Չորեքշաբթի երեկոյան ցորենի բոված ալյուրից եւ խաղողի ռուպից անուշեղեն՝ դալաթ են պատրաստել¹¹³: Մարաշում Սբ. Սարգսի տոնին մի շաբաթ պաս են բռնել, որի առաջին երեք օրերը՝ ծոմով, իսկ չորեքշաբթի այն լուծել են ռուպով պատրաստած դահինեն հրուշակով եւ շա-

¹⁰⁹ Տեն, օրինակ, Տեղեկագրություն ընդհանուր վիճակին Սեբաստիոյ..., էջ 186–187, Մ. ԴԱՆԻԷԼԵԱՆ, նշ. աշխ., էջ 404, ԵՐ. ՇԱՀԱԶԻՋ, Նոր Նախիջեւանը եւ Նոր-Նախիջեւանցիք. Ծէսեր եւ սովորություններ, ԱՀ, գր. Թ., Թիֆլիս, 1902, էջ 17, ՎԱՀԱՆ ՎՐԳ. ՏԷՐ-ՄԻՆԱՍԵԱՆ, նշ. աշխ., էջ 53–54, Ա. ԱԼՊՈՅԱՃԵԱՆ, Պատմութիւն Եւդոկիոյ հայոց, էջ 1526, Մ. ՍԻՍԵՌԵԱՆ (Մ. ՈՒԼՆԵՅԻ), նշ. աշխ., էջ 202:

¹¹⁰ Մ. ԴԱՆԻԷԼԵԱՆ, նշ. աշխ., էջ 404:

¹¹¹ Տեն, օրինակ, Ս. ՄԿՐՏՁՅԱՆ, նշ. աշխ., էջ 42:

¹¹² Առաջավորաց պահքի ընթացքում Քառասնից մանկանց ծես հիշեցնող մեկ ալլ ծես տեն Մ. ԴԱՆԻԷԼԵԱՆ, նշ. աշխ., էջ 406: Հմմտ. Գ. ՍՏԵՓԱՆՅԱՆ, «Քառասուն մանկունք»ի ծիսառասպելաբանական առումները, Հայ ազգաբանության եւ հնագիտության խնդիրներ, II, խմբագրիրենք՝ Գ. ՎԱՐԳՈՒՄՅԱՆ եւ այլք, Երեւան, 2003, էջ 57–60: Ուշագրավ է այն, որ ինչպես յոթշաբաթյա Մեծ պահքի կեսին՝ չորրորդ շաբաթվա ընթացքում Միջինքի չորեքշաբթիից մինչեւ շաբաթ-կիրակի որոշակիորեն տոնական շրջան է եղել (այս մասին տես Հ. ԱՔՐԱՀԱՄՅԱՆ, Միջինքի եւ Սեբաստիայի Քառասնից մանկանց տոները հայոց եկեղեցական եւ ժողովրդական տոնացույցերում, «Պատմաբանասիրական հանդես», 2019, 3, էջ 212–232), այնպես էլ մի շաբաթ վայրերում Սբ. Սարգսի պահքի չորեքշաբթի է ծոմը լուծվել, ապա վերսկսվել, կամ միայն պահքն է շարունակվել:

¹¹³ ՎԱՀԱՆ ՎՐԳ. ՏԷՐ-ՄԻՆԱՍԵԱՆ, նշ. աշխ., էջ 50–51:

քարախառն դահին-հացով¹¹⁴: Արճակում երկուշաբթիից ծոմ են պահել, չորեքշաբթի ճաշին մեկ անգամ կերել, ապա ծոմը շարունակել մինչև ուրբաթ երեկո¹¹⁵:

բ) Ծոմբաց՝ խաչմեր¹¹⁶ խմելով: Սսում Սբ. Սարգսի պասին ծոմ պահածներն այն լուծել են չորեքշաբթի՝ նույն օրվա ժամերգության ժամանակ կատարված ջրօրհնեքին օրհնված ջրով¹¹⁷: Մարաշում Առաջավորաց պահ-քի երկուշաբթիից սկսած՝ աղջիկները եւ տարեց կանայք երեք օր ծոմ են պահել, ապա լուծել՝ չորեքշաբթի առավոտ եկեղեցում խաչմեր խմելով¹¹⁸, եւ տուն դառնալով՝ կերել են ալլա հոց (առանց աղի եւ թթխմորի հաց) կամ փխաճո («ռոփ ապուր»¹¹⁹), որը Սբ. Սարգսի տոնին նշանավոր փոխինդով խաշիլն է¹²⁰: Առաջավորաց պահքի ընթացքում կամ ավարտին ջուր օրհնելու մասին եկեղեցական կանոնական հրահանգ չի հանդիպում, ուստի բերված օրինակները, ըստ ամենայնի, տեղային բնույթ են կրել եւ բխել են ժողովրդական սովորույթից: Այդ են վկայում ստորեւ բերված օրինակները, որոնցում Սբ. Սարգսի պահքը լուծվել է ջրով, սակայն ոչ թե եկեղեցում օրհնված, այլ՝ սրբավայրի տարածքում եղող:

Դերսիմում աղջիկ կամ տղա սիրելիի հետ ամուսնանալու ակնկալիքով Սբ. Սարգսի շաբաթը պահք ու ծոմ պահելուց հետո բարձրացել են

¹¹⁴ Ե. ՏԷՐ ՂԱԶԱՐԵԱՆ, Մարաշահայ բարբեր, «Բազմավէպ», Վենետիկ-Ս. Ղազար, հտ. ձժԱ, 1953, Յունիս-Յուլիս, թիւ 6-7, էջ 128-129:

¹¹⁵ Ս. ԱՎԱԳՅԱՆ, Արճակ, ՀԱՐ, պր. 8, Երեւան, 1978, էջ 92:

¹¹⁶ Խաչմայրը նշանակում է խաչով օրհնված ջուր (տե՛ս ՀԼԲԲ, հտ. Բ., էջ 288) եւ խաչալվայի ջուր (տե՛ս Հ.Ր. ԱՃԱՌԵԱՆ, Հայերէն գաւառական բառարան, էմինեան ազգագրական ժողովածու, Թ., Թիֆլիս, 1913, էջ 454): Խաչալվան եւս նշանակում է խաչով լվացված, օրհնված ջուր (տե՛ս ՆԱՐԵԿ ՎՐԿ. ԱՎԱԳՅԱՆ, Հանդերի՝ կարկուտից պահպանմանն ու բերքի առատ լինելուն նվիրված եկեղեցական կանոնները, «էջմիածին», 2019, Լ., էջ 25): Եկեղեցում բերքի, առողջության համար ջրի օրհնության կանոնները, Ջրօրհնեքի արարողությունից սկսած, անվանվել են խաչալվա (Անդ, էջ 22): Խաչալվան, որը կոչվում է նաեւ Խաչահանգիստ, նաեւ բժշկության նպատակով են կիրառում (տե՛ս ՍՏԵՓԱՆՈՍ ԱՒ. ՔԶՆՅ. ՄԱՆԴԻՆԵԱՆՅ, Աստուածապաշտութիւն Հայաստանեայց Ուղղափառ Եկեղեցւոյ, Ի Վաղարշապատ, 1872, էջ 117):

Եկեղեցին ունի խաչալվայի համար սահմանված կանոն, որը կա մեզ հասած հնագույն՝ Ժ. դարով թվագրվող Մաշտոցում (տե՛ս ՄԱՅՐ ՄԱՇՏՈՅ, Ժ. դար, հտ. Ա., Գիրք Ա., Ըստ հնագույն երկաթագիր ձեռագրերի եւ համեմատութեամբ Աստուածաշունչ մատենի, բնագրական եւ կանոնացանկային լուսնալուծովք, աշխատասիրութեամբ՝ Գ. ՏԷՐ-ՎԱՐԿԱՆԵԱՆԻ, Սբ. էջմիածին, 2012, էջ 416-420, 807):

¹¹⁷ Մ. ՔԷԼԷՇԵԱՆ, նշ. աշխ., էջ 525:

¹¹⁸ Յ. Մ. ՎԱՐԺԱՊԵՏԵԱՆ, Մարաշի մէջ նշանաւոր օրեր իրենց ծէսերով, «Բիրական», Կ. Պոլիս, 1898, 27 օգոստոս, էջ 523:

¹¹⁹ ԳՐ. ԳԱՆՈՒՍԵԱՆ, նշ. աշխ., էջ 334:

¹²⁰ ԳՐ. ԳԱՆՈՒՍԵԱՆ, նշ. աշխ., էջ 334, Հ. ԽԱՌԱՏԵԱՆ, Հայ ժողովրդական տոները, էջ 69:

Տուժիկ պապա լեռան անմատչելի ապառաժներում կառուցված Սբ. Սարգսի վանք եւ մոտից բխող Գանիէ հազրեթի խրզրի կամ Սբ. Սարգսի ամենագոր աղբյուրի սրբազան ակից ջուր խմել¹²¹: Օձնեցիներն էլ Սբ. Սարգսի տոնին գնացել են Մտի գլխի Սբ. Սարգսի խաչը՝ ուխտ անելու: Այնտեղ ջուր են լցրել խաչի վրա եւ այդ խաչալվայի ջրով ու մեղրով փոխինդից կլոնդակ են պատրաստել: Դրանով էլ իրենք են թաթախվել, եւ ընտանիքի անդամների համար են տարել¹²²: Ուշագրավ է, որ խաչալվա նշանակում է նաեւ օրհնված ջրով պատրաստված ուտելիք կամ խմելիք¹²³, ինչպես նաեւ ուխտատեղիից բերված քաղցրավենիք¹²⁴, որով, փաստորեն, ծոմը լուծել են:

Ինչպես տեսնում ենք, ծոմը լուծվել է կամ քաղցրավենիքով, կամ խաչմեր խմելով, կամ այդ քաղցրավենիքը հենց խաչմերով է պատրաստվել:

գ) Ծոմբաց՝ մատաղով: Զեյթունում նույնիսկ տարեցները Սբ. Սարգսի երկուշաբթիից մինչեւ շաբաթ երեկո ծոմ են պահել ու շաբաթ երեկո ծոմը բացել են՝ ոչխարի կամ այծի մատաղ բաժանելով աղքատներին եւ Հաղորդություն ճաշակելով¹²⁵: Սպահանի Փերիա գավառում ում նույնպես Սբ. Սարգսի տոնին եկեղեցու բակում մատաղ եւ հարիսա են արել եւ բաժանել¹²⁶:

դ) Ծոմբաց՝ չորեքշաբթի հաղորդություն ստանալով: Հանդիպում է նաեւ Սբ. Սարգսի առաջին երեք օրերի ծոմը հաղորդությամբ լուծելու դրվագ, երբ կանայք, երեք օր ծոմ պահելուց հետո, չորեքշաբթի երեկոյան գնացել են եկեղեցի՝ հաղորդություն ստանալու¹²⁷: Երիտասարդ աղջիկները, ինչպես հայկական մյուս գավառներում, այնպես եւ Զեյթունում, մինչեւ չորեքշաբթի կեսօր ծոմ են պահել, ապա ժամ են գնացել, խոստովանել եւ սրբություն առնելով (հաղորդություն ստանալով¹²⁸.— Հ. Ա.)՝ տուն

¹²¹ ՀԱԻ արխ., Գ. ՀԱԼԱՋՅԱՆԻ ֆոնդ, էջ 1245, 1248:

¹²² Տէս Ե. ԼԱԼԱՅԵԱՆ, Բորչալուի գաւառ. Նշանաւոր տօներ, ԱՀ, գր. Ժ., էջ 256:

¹²³ Տէս ՀԼԲԲ, հտ. Բ., էջ 286:

¹²⁴ Տէս Է. ԱՂԱՅԱՆ, Արդի հայերենի բացատրական բառարան, հտ. Ա., Երեւան, 1976, էջ 564:

¹²⁵ Մ. ՍԻՍԵՌԵԱՆ (Մ. ՈՒԼՆԵՅԻ), Պատմութիւն Զեյթունի (1409–1921), Լիբանան, 1996, էջ 202:

¹²⁶ Ա. ԵՐԵՄԵԱՆ, նշ. աշխ., էջ 116:

¹²⁷ Ա. ԱԼՊՈՅԱՅԵԱՆ, Պատմութիւն Հայ Կեսարիոյ (տեղագրական, պատմական եւ ազգագրական ուսումնասիրութիւն), հտ. Ա., Գահիրէ, 1937, էջ 781:

¹²⁸ Սրբություն առնել նշանակում է հաղորդվել (տես ՀԼԲԲ, հտ. Ե., Երեւան, 2008, էջ 393):

դարձել¹²⁹։ Սեբաստիայում, երկուշաբթի օրվանից սկսած, հարսնացուն երեք օր ծոմ է պահել եւ չորեքշաբթի օրն ընկերուհիներին եւ մոր ուղեկցությամբ գնացել եկեղեցի՝ Հաղորդություն առնելու¹³⁰։ Հարկ է նշել, որ եկեղեցական ծիսակարգում Առաջավորացի չորեքշաբթի օրը Պատարագ մատուցելու եւ Հաղորդություն բաշխելու ավանդույթ չկա, եթե այդ օրը չի զուգադիպում Տերունական կամ սուրբի տոնին։ Հետեւաբար՝ վերն ասվածը, ըստ ամենայնի, մասնակի եւ տեղային բնույթ է կրել։

Այսպիսով՝ ժողովրդական կենցաղում Սբ. Սարգսի պասը, անկախ այն բանից, չորեքշաբթի է ավարտվել, թե շաբաթ, լուծվել է ալյուրի հումքով պատրաստված քաղցրավենիքով (փոխինդ, հալվա), ջրով, մատաղով եւ Սբ. Հաղորդություն ստանալով։ Որոշ դեպքերում դրանք հաջորդել են միմյանց, որոշ դեպքերում՝ միայն մեկն է եղել։ Փոխինդը կամ հալվան, ջուրը եւ կենդանական մատաղը, որոնցով պահքը լուծել են, զոհաբերություն-հաղորդություն են, որոնք ցուցում են տոնի՝ երկրագործական եւ անասնապահական տնտեսածեւերի համար՝ բարեհաջող տարի լինելը։ Այդ համապատկերում ուշագրավ է այն, որ որեւէ ուխտատեղիի տոնի օրը այդ եկեղեցու հատակի տակը գինի կամ ձու պահել։ Այդ երեւույթը եւս խաչալվա է կոչվել։ Երբ խաչալվան պահող ուխտավորները հաջորդ տարի կրկին գնացել են, այն հանել են, սկզբում իրենք են կերել կամ խմել, հետո բաժանել են, որպեսզի իրենց ուխտն ընդունելի լինի¹³¹։ Այստեղ ձուն առնչվում է անասնապահական մշակույթին, գինին՝ երկրագործական։

Սբ. Հակոբի ծոմ։ Սբ. Հակոբ Մծբնա Հայրապետի հիշատակի օրը սահմանված է դեկտեմբերի 12-ից 18-ը հանդիպող շաբաթ օրը¹³²։ Տոնին նախորդող շաբաթապասը վկայված է 1292 թ. Ստեփանոս Գոյներիցանցի խմբագրած Տօնացոյցում¹³³։ Շաբաթապասի ընթացքը նման է Սբ. Սարգսի տոնին նախորդող շաբաթապասի ընթացքին։ Մասնավորաբար հետաքրքրական է այն, որ ինչպես Սբ. Սարգսի պահքն է խաչմեք խմելով լուծվել, այնպես եւ՝ Սբ. Հակոբինը։ Այսպես, Մարաշում Սբ. Հակոբի

¹²⁹ Մ. ՍԻՍԵՌԵԱՆ (Մ. ՈՒԼՆԵՑԻ), նշ. աշխ., էջ 202։

¹³⁰ Տեղեկագրութիւն ընդհանուր վիճակին Սեբաստիոյ եւ անոր կուսակալութեան ներքեւ գտնուող մէկ քանի գլխաւոր քաղաքաց, աշխատասիրեաց ՊՕՂՈՍ ՎՐԳ. ՆԱԹԱՆԵԱՆ, Կ. Պօլիս, 1877, էջ 186–187։

¹³¹ Յ. ՆԱԶԱՐԵԱՆՅ, Նախապաշարմունք, Տփլիս, 1878, էջ 61։

¹³² Տ. ԹՈՐԳՈՄ ՊԱՏՐԻԱՐԳ, Սուրբք եւ տօնք Հայաստանեայց եկեղեցւոյ, Երուսաղէմ, 1957, էջ 31։

¹³³ Տէս Ռ. ՎԱՐԳԱՆՅԱՆ, նշ. աշխ., էջ 484։

(էկիւբ) պահքի ժամանակ մեկ, երեք կամ հինգ օր են պահք բռնել: Առավոտյան եկեղեցի են գնացել եւ խաչմեր խմելով՝ պահքը բացել¹³⁴:

Մյուս ընդհանրությունը ծոմբացն է: Բալուում Սբ. Սարգսի եւ Սբ. Հակոբի շաբաթապասերի ընթացքում մասնավորապես կանայք, հարսները եւ չափահաս աղջիկները երկուշաբթի օրվանից սկսյալ, մինչեւ չորեքշաբթի կեսօր, եւ չորեքշաբթի կեսօրից մինչեւ ուրբաթ երեկո պահք են պահել, այսինքն՝ երկուսուկես օր բնավ չեն ճաշել եւ ջուր չեն խմել: Միակ ճաշը չորեքշաբթի կեսօրին է եղել: Ապա հրավիրել են դրացի եւ ազգական կանանց, ովքեր պահոց կերակուրներ վերցնելով՝ ծոմապահի տուն են գնացել եւ միասին ճաշել: Այս ճաշն անվանել են ծոմբաց (ծոմփաց)¹³⁵: Մարաշում Սբ. Հակոբի տոնին ծոմապահ աղջիկներին նշանածի տնից մի սկուտեղ հրուշակ (հէլվա), դարչըն (Մարաշին հատուկ ոտնաման) եւ գուլպա են ուղարկել՝ որպես նվեր¹³⁶: Սբ. Հակոբի պահքի չորեքշաբթի ռուպով պատրաստված ապուր եւ դահինե հրուշակ են կերել, որից ուղարկել են նաեւ բարեկամներին¹³⁷:

Հաջորդ զուգահեռը կարելի է անցկացնել Սբ. Սարգսի եւ Սբ. Հակոբի տոների ժամկետների միջեւ: Եթե առաջինը, լինելով հունվարի վերջին եւ փետրվարին, նախորդում է գարնանամուտին՝ գյուղատնտեսական աշխատանքների նախապատրաստման շրջանին, ապա երկրորդը, լինելով դեկտեմբերին, նույն աշխատանքների ամփոփման շրջանում է (այդ են վկայում նաեւ Սբ. Հակոբի պահքի անվանումները՝ Ձմեռնամուտի (այսպես է կոչվում, քանի որ չորս եղանակային պահքերից մեկն է¹³⁸) եւ Նախարթողի (քանի որ տնտեսական տարին փակվում էր, եւ ցրտի պատճառով նախիրն այլեւս արոտ չէին տանում¹³⁹):

Նկատի առնելով տնտեսական տարվա մեկնարկին եւ ամփոփման շրջանում հանդիպող ջրին առնչվող ծեսը, ի դեմս ծոմապահության (ըն-

¹³⁴ Տէս Յ. Մ. ՎԱՐԺԱՊԵՏԵԱՆ, Մարաշի մէջ նշանաւոր օրեր իրենց ծէսերով, «Բիւրակն», Կ. Պոլիս, 1898, 24 սեպտեմբեր, էջ 586, Գ. ԳԱՆՈՒՍՅԱՆ, նշ. աշխ., էջ 344, Ե. Տէր ՂԱԶԱՐԵԱՆ, նշ. աշխ., էջ 127:

¹³⁵ Բալու..., էջ 438–439:

¹³⁶ Տէս Յ. Մ. ՎԱՐԺԱՊԵՏԵԱՆ, Մարաշի մէջ նշանաւոր օրեր իրենց ծէսերով, «Բիւրակն», Կ. Պոլիս, 1898, 24 սեպտեմբեր, էջ 586, Գ. ԳԱՆՈՒՍՅԱՆ, նշ. աշխ., էջ 344, Ե. Տէր ՂԱԶԱՐԵԱՆ, նշ. աշխ., էջ 127:

¹³⁷ Ե. Տէր ՂԱԶԱՐԵԱՆ, նշ. աշխ., էջ 127:

¹³⁸ Տէս Ա. ՂԱԶԱՐԵԱՆ, նշ. աշխ., էջ 844:

¹³⁹ Հ. ԽԱՌԱՅԱՆ, Հայ ժողովրդական տոները, էջ 246:

թացքում ջուր չեն խմում) եւ ծոմալուծության (ծոմը ջրով են լուծում), կարող ենք ենթադրել, որ այն կապված է անհրաժեշտ քանակությամբ ջուր ունենալու հետ, ինչով էլ պայմանավորված է երկրագործական եւ անասնապահական տարեշրջանի բարեբերությունը (հարկ է նշել, որ Սբ. Սարգսի տոնական ուտեստ փոխինդը, հալվան եւ Սբ. Հակոբի տոնական ուտեստ հարիսան¹⁴⁰, եւս առնչվում են տնտեսական տարվա բարեբերությանը): Երկու սուրբերը եւ նրանց տոներն առնչություն ունեն ջրի հետ. Սբ. Սարգսի տոնի ժամանակ չի կարելի գլուխ վաճառել, վացք անել¹⁴¹, ծոմչեքի մաս է կազմում բաղնիքը¹⁴², իսկ Սբ. Հակոբի կերպարը (նաեւ՝ նրան առնչվող ուխտավայրերը) մեծապես կապված են ջրի, երաշտի եւ անձրեւաբերության հետ¹⁴³:

Այսպիսով՝ ինչպես մի շարք տոների եւ ծեսերի, այնպես եւ Սբ. Սարգսի ու Սբ. Հակոբի ծոմապահության մեջ երկու մշակույթ է միախառնվել՝ մինչքրիստոնեական եւ քրիստոնեական, ինչը դրսեւորվում է ծոմից դուրս գալիս օրհնված ջուր խմելով, ծիսական ուտեստի ճաշակմամբ եւ Սբ. Հաղորդություն ստանալով:

Վարդավառի ծոմ: Վերը տեսանք, որ Դավիթ Ալավկա Որդին ծոմապահություն է հորդորել ոչ միայն Զատիկի, այլ նաեւ Վարդավառի եւ Ծննդյան տոներին նախորդող հիսնակաց պահքերի ընթացքում: Հատկանշական է, որ ազգագրական նյութերում ծոմապահության դրվագներ հանդիպում են նաեւ Վարդավառին նախորդող քառասնորդաց (հիսնակաց) պահքի ընթացքում:

Մեզ հանդիպած դրվագում Վարդավառի ծոմապահությունը հիշեցնում է Սբ. Սարգսի ծոմապահությունը: Առաջին դեպքում Վարդավառի նախորդ օրը չամուսնացածները չափից ավելի աղի (շոռ) ուտելիք են օգտագործել եւ ցերեկը ջուր չեն խմել՝ երազում սիրելիի ձեռքից ջուր ստանալու ակնկալիքով¹⁴⁴: Երկրորդ օրինակը վերաբերում է ԺԴ. դարի կեսերին, երբ միայնակյացը Սբ. Սարգսից մինչեւ Վարդավառ ջուր չի խմել:

¹⁴⁰ Անդ, էջ 246:

¹⁴¹ Տէս Ա. ՄԿՐՏՁՅԱՆ, նշ. աշխ., էջ 43:

¹⁴² Տէս, օրինակ, Տեղեկագրութիւն ընդհանուր վիճակին Սեբաստիոյ..., էջ 186–187:

¹⁴³ Այս մասին տես Լ. ՍԻՄՈՆՅԱՆ, Սբ. Հակոբ Մծբնա Հայրապետի հիշատակը հայոց մեջ, Երեւան, 2022, էջ 52–57, 67–148, 159–162:

¹⁴⁴ ՀԱԻ արխ., Հ. ՀԱՅՐԱՊԵՏՅԱՆԻ Փոնդ, Սիսիանի շրջանի Շաղաթ գյուղի պատմությունը եւ ապրելակերպը (1828–1928 թթ.), Գործ 2, 1982, էջ 131:

«Մաղաքիա Ղրիմեցին իր տեսակին մէջ յատուկ դէմք մըն է, ... միս ոչ եկեր եւ գինի ոչ էարբ, որ Սբ. Սարգսի տօնէն մինչ ի տօն Վարդավառին ջուր ոչ էարբ, որ ի մեծի պահոցն՝ կիրակիէ միայն փոշեջուր ճաշակէր»¹⁴⁵:

Եթե Սբ. Սարգսի պահքը, փետրվարին լինելով, ձյան առատ տեղումների շրջան է, ապա Վարդավառը տարվա ամենատաք շրջանն է, երբ երաշտի դեպքում կարող է լինել խիստ չորային, ուստի ըստ երեւույթին անձրեւ առաջացնելու նպատակով է ջրի ծոմ պահվել¹⁴⁶: Այս ծիսական փոխկապակցվածությունը կարող է բացատրվել նրանով, որ հունվար-փետրվարին տեղացած առատ ձյունը ջրի անհրաժեշտ պաշար կարող էր ապահովել տարվա ամենատաք եւ գյուղատնտեսական աշխատանքների գործուն շրջանում՝ հուլիսին: Վարդավառին հազվադեպ հանդիպող ծոմապահությունը զուգահեռներ ունի Սբ. Սարգսի ծոմապահության հետ ծիսական եւ ժամկետային առումներով:

Այսպիսով՝ ժողովրդական տոնացույցում առկա ծոմապահության ժամկետներից Սբ. Սարգսի, Սբ. Հակոբի եւ Վարդավառի տոներին նախորդող ծոմապահքերն առնչվում են ջրի հետ՝ ժամկետներով, համանման ընթացքով, լուծման եղանակներով:

Շարունակությունը հաջորդիվ

¹⁴⁵ ՄԱՂԱՔԻԱ ԱՐՔ. ՕՐՄԱՆԵԱՆ, Ազգապատում, հտ. Բ., էջ 2301:

¹⁴⁶ Անձրեւ առաջացնելու նպատակով ծոմապահության սովորույթ եղել է տարբեր ժողովուրդների մոտ (տե՛ս Զ. Ֆրեյզեր, Ոսկե ճյուղը, Երեւան, 1989, էջ 79–80, Э. Тэйлор, Первобытная культура, перевод с английского под редакцией В. Никольского, Москва, 1939, էջ 417–418):

